

आपणो ढूँढाड, आपणी संरकरति

साथण

अक्टूबर सँ दिसम्बर-2021



चंगाई सबसँ बडी इनाम छै, साल्ति सँ
रहबो ही बडो धन छै, सावकारी सबसँ
बडो बेवार छै – गौतम बुद्ध

ढूढाडी डै सरकार की योजना

खेत डै पाणी पाढाढा पाइप लेण की योजना:

या योजना राजस्तान का पूरा जिला डै खेती कै तोडी सिंचाई की मातरा बढाबा बेई सरकार या योजना ल्याई छै।

ई योजना डै अनुदान:-

पाणी की कोठी, बोरवेल, खाडो या तळाव सँ खेत तक पाणी लेजाबा के तोडी सरकार किसानानै सरकार सँ निरधारित साईज का पी.वी.सी./एच.डी.पी.ई. पाइप की खरीद डै सारा किसानानै खरीद की लागत को 50 पतिसत या जादा सँ जादा रासी 50 रफ्या प्रति मीटर एचडीपीई पाइप पर या 35 रफ्या प्रति मीटर पीवीसी पाइप डै या 20 रफ्या प्रति मीटर एचडीपीई लेमिनेटेड ले-फलेट टचूब पाइप डै या फेर जादा सँ जादा 15000 रफ्या ज्यो भी लागू हैला वै रफ्या सरकार देली।



ई योजना डै कुण ले सकै छै:-

ज्याँ पाळत्याँ कै जमी नाँव छै अर कोठी डै बिजळी/अंजन/टेक्टर सँ चालबाळो पाणी को पंखो छै वै पाळती ई योजना को लाभ ले सके छै। सामलात की कोठी डै न्यारा-न्यारा दो अंजन या मोटर हैवै अर वा सीर डै हैवै पण वाँ सगळा की जमी न्यारी-न्यारी (जमाबन्दी) छै तो सारा पाळती न्यारा-न्यारा दो पाइप लेण लगाबा का हकदार छै। सामलाती कुवा-कोठी, बोरवेल, तळाव या दूसरा पाणी का साधन सँ सगळा पाळती मलर दूर तक पाणी लेजाबा कै तोडी फारम भरै छै तो सगळा ई योजना सँ पीसा लेबा का हकदार छै।

ई योजना कै तापी कागजात:-

ई योजना को लाभ लेबा कै तोडी हर पाळती कन आधार कार्ड/ जन आधार कार्ड, जमी की नकल की जमाबन्दी देबो जरूरी छै।

फारम कियॉ भर्यॉ:-

थाँकै साँकडै का ई-मितर पै जार थे यो फारम भर सकै छै। भरेड़ा फारम पै पाळती का साइन कर र सारा कागजात ई-मितर पै जमा करार रसीद जरूर ले।

पाळती ई-मितर पै जार ओन-लाईन फारम भरवाओ अर जरूरी कागजात नै स्केन कर अपलोड करवाओ।

खुद भी फारम भर सकै छै:-

पाळती फारम ओन-लाईन फारम भर जरूरी कागजातॉ नै स्केन कर अपलोड कर सकै छै। फारम भरबाळो ओन-लाईन फारम की रसीद भी ओन-लाईन ही लेवै लो।

फारम भरबाळो पाळती सगळा कागजातॉ नै खुद या फेर डाक सूँ करसी विभाग का दफतर मै जमा करा अर ऊँकी रसीद जरूर लेवै। ई-मितर पै भरेड़ा फारम कै साथ-साथ जरूरी कागजात -आधार कार्ड/जन-आधार कार्ड, जमाबन्दी की नकल (छह महना सूँ जादा पराणी न हैणी चाईजे) अर सादा कागज पै सपथ पतर कै म्हारै खनै पीवल या बना पीवल जमी छै।

फारम भरबा को टैम:- काम पूरो हैबा कै 30 दिन कै माईनै ही फारम नै भरणो चाईजे।

लाभ कडा सूँ मलैलो:- हर जिला मै एक करसी दफतर छै थाँको फारम उण्डै जावैलो अर वै ही पीसा पास करैला।

ई योजना को लाभ लेबा कै ताणी कुण सूँ मलॉ:- ग्राम पंचायत मै- करसी परवेक्सक पंचायत, समिति मै- सहयोगी करसी अधिकारी, उप जिला स्तर पै- सहायक निदेसक करसी (विस्तार)/ बाग-बगीचा अधिकारी, जिला स्तर पै- उप निदेसक करसी (विस्तार)/उपनिदेसक बाग-बगीचा किसान समाधान सूँ जुड़बा के तोड़ी थाँको धणो-घणो धन्यवाद

साँच बोलबा को यो फायदो छै कि थाँनै याद राँखबा की जरत कोनै।

पेळ्याँ

1. अकल की कोटड़ी, अर बकल का कुँवाड़।

लाला को सो झूमको, अर पाणी सा ख्याल ॥

उत्तर : चड़स अर ढाणो

2. हर्या कुँवाड, लाल मकान।

जिमै बैठचा काळा मुसाण ॥

उत्तर : मतीरो

3. हरी-बरी बेलड़ी, धरा रावण को नेफो।

राम लछमण बोल्या, ऊठा टाँगड़ी देखो ॥

उत्तर : मूफळी

4. च्यार कूँट को चूँतरो, च्यारूँ मूण्डा खाई।

जंगळ मै बासा करै, नाहर डरपतो जाई ॥

उत्तर : गोखरू

साख

1. सतगुरु मेरा बाणियाँ, बिणज करै बोपार।

तन डाण्डी, मन पालड़ा, तोल लिया संसार ॥

2. राम नाँव की एक झोपड़ी अर पापी का दस गाँव।

आग लगे ऊँन गाँव को जाँ नहीं भगवान का नाँव ॥

3. सतगुरु जी रा नाँव सूँ, भाई आई बला टळ जाई।

मस्तक पै सूळी लागै, वा काँटा पै टळ जाई ॥

सम्पर्क

निर्माण सोसायटी

वार्ड नं. 6, तकिया मस्जिद के पास, काली हवेली के पीछे,

देशवालियों का मोहल्ला, चाकसू, जयपुर, राजस्थान-303901

Ph-01429-243997, 9982668204, 9887748510

Email- rajasthanlanguages@nirmaan.org.in

Web- www.dhundari.org.in, www.nirmaan.org.in

मुवावरा

1. हात पीळा करबो।

अर्थ = शादी करना।

वाक्य में प्रयोग :- रामलाल तो ऊँकी छोरी का हात पीळा कर दियो।

2. होस समाळबो।

अर्थ = जिम्मेदारी का भार संभालना।

वाक्य में प्रयोग :- बदरी को छोरो ऊँका हैताँ छताँई होस समाळ लियो।

3. मोका पै चोको मारबो।

अर्थ = मोखा देख के वार करना।

वाक्य में प्रयोग :- रामलाल तो लड़ाई मै मोखा पै चोको मारै छै।

असल मै बडो

आदमी तो वो

छै, जे खुद कै

साथ बरो

करवाळा को

भी, भलो ही

सोचै छै। –

महात्मा गांधी